

**SOALAN-SOALAN LAZIM (FAQ) BERKENAAN
PENGUATKUASAAN FASA 3
AKTA PERUBATAN TRADISIONAL DAN
KOMPLEMENTARI 2016 [AKTA 775]**

1. Apakah itu Akta Perubatan Tradisional dan Komplementari 2016 [Akta 775]?

Akta Perubatan Tradisional dan Komplementari 2016 [Akta 775] merupakan suatu Akta untuk mengadakan peruntukan bagi penubuhan Majlis Perubatan Tradisional dan Komplementari (Majlis PT&K) untuk mengawal selia perkhidmatan perubatan tradisional dan komplementari (PT&K) di Malaysia dan mengadakan peruntukan bagi perkara-perkara yang berkaitan dengannya. Akta ini boleh diakses dan dimuat turun dengan klik pada pautan [Akta Perubatan Tradisional dan Komplementari 2016 \[Akta 775\]](#).

2. Bagaimanakah Akta 775 dikuatkuasakan?

Penguatkuasaan Akta 775 dilaksanakan secara berfasa melalui pemberitahuan dalam Warta dengan penetapan permulaan kuat kuasa yang berlainan oleh Menteri Kesihatan seperti yang berikut:

(i) Fasa 1

Melalui Penetapan Tarikh Permulaan Kuat Kuasa [*P.U. (B) 325/2016*], **Fasa 1** telah berkuat kuasa pada 1 Ogos 2016 memfokuskan mengenai penubuhan Majlis PT&K, mengenal pasti bidang amalan diiktiraf serta hal-hal mengenai penetapan badan pengamal PT&K.

Melalui Perintah Perubatan Tradisional dan Komplementari (Bidang Amalan Diiktiraf) 2017 [*P.U. (A) 223/2017*], yang telah mula berkuat kuasa pada 1 Ogos 2017, terdapat tujuh (7) bidang amalan yang diiktiraf iaitu—

- (a) Perubatan tradisional Melayu;
- (b) Perubatan tradisional Cina;
- (c) Perubatan tradisional India;
- (d) Homeopati;
- (e) Kiropraktik;
- (f) Osteopati; dan
- (g) Amalan pengubatan Islam.

(ii) Fasa 2

Melalui Penetapan Tarikh Permulaan Kuat Kuasa [*P.U. (B) 118/2021*], **Fasa 2** telah berkuat kuasa pada 1 Mac 2021 memfokuskan mengenai pentadbiran am Majlis PT&K, hal-hal pengamal PT&K, kewajipan dan tanggungjawab pengamal berdaftar, prosiding tatatertib, hak pesakit dan penguatkuasaan kesalahan oleh badan korporat. Pada fasa ini juga, Peraturan-Peraturan Perubatan Tradisional dan Komplementari 2021 [*P.U. (A) 69/2021*] juga mula berkuat kuasa.

Penguatkuasaan dalam Fasa 2 memfokuskan kepada pendaftaran pengamal PT&K dalam bidang amalan diiktiraf dengan Majlis PT&K, hal-hal mengenai penyenggaraan daftar dan prosiding tatatertib.

Fasa ini juga merupakan suatu tempoh peralihan bagi tujuan pendaftaran pengamal PT&K yang merujuk kepada tempoh masa yang ditetapkan untuk membenarkan pengamal yang dikategorikan sebagai golongan '*grandfathering*' iaitu pengamal tanpa kelayakan asas yang diiktiraf tetapi berkemahiran dan berpengalaman dalam sesuatu bidang amalan yang

diiktiraf, untuk berdaftar dengan Majlis PT&K mengikut keperluan yang dinyatakan.

Peraturan-Peraturan Perubatan Tradisional dan Komplementari 2021 [*P.U. (A) 69/2021*] dan Peraturan-Peraturan Perubatan Tradisional dan Komplementari (Pindaan) 2024 [*P.U. (A) 68/2024*] menetapkan kelayakan untuk memohon sebagai pengamal untuk didaftarkan di bawah Akta 775. Melalui Peraturan-Peraturan ini, pemohon hendaklah memperoleh kelayakan diiktiraf sebagaimana yang dinyatakan dalam Jadual Ketiga [*P.U. (A) 69/2021*] atau memenuhi apa-apa keperluan pengalaman dalam bidang amalan yang diiktiraf dan menjalani kursus pembangunan kapasiti dalam bidang amalan yang diiktiraf sebagaimana yang difikirkan patut oleh Majlis PT&K (sekiranya dikehendaki oleh Majlis PT&K).

(iii) Fasa 3

Melalui Penetapan Tarikh Permulaan Kuat Kuasa [*P.U. (B) 246/2024*], **Fasa 3** telah berkuat kuasa pada 1 Ogos 2024. Penguatkuasaan Fasa 3 ini memfokuskan kepada aktiviti penguatkuasaan serta tindakan perundangan yang boleh diambil dan dilaksanakan

berdasarkan peruntukan yang diberikan di bawah Akta 775. Aktiviti penguatkuasaan termasuk pemeriksaan rutin ke atas pengamal PT&K dalam bidang amalan diiktiraf, pengesahan dan penyiasatan aduan, dan pemantauan kepada pematuhan Akta 775. Pegawai penguat kuasa PT&K akan menjalankan lawatan ke premis secara berkala, menyemak rekod, dan memastikan pematuhan kepada piawaian dan amalan PT&K yang ditetapkan.

3. Bilakah tarikh penguatkuasaan Fasa 3, Akta 775?

Tarikh permulaan kuat kuasa Fasa 3, Akta 775 adalah pada **1 Ogos 2024**.

4. Apakah seksyen yang mula berkuat kuasa dalam penguatkuasaan Fasa 3, Akta 775?

Dalam penguatkuasaan Fasa 3, Akta 775, seksyen-seksyen yang mula berkuat kuasa adalah seperti yang terdapat dalam Bahagian IX, Penguatkuasaan di bawah Akta 775 iaitu seksyen 48, 49, 50, 51, 52, 53, 54, 55, 56, 57, 58 dan 59.

5. Apakah yang berlaku semasa penguatkuasaan Fasa 3, Akta 775?

Dalam penguatkuasaan Fasa 3, Akta 775, aktiviti penguatkuasaan dan tindakan perundangan akan bermula. Pelaksanaan ini akan dibahagikan kepada dua (2) peringkat iaitu:

(i) Semasa Tempoh Peralihan (Sehingga 28 Februari 2025)

Sepanjang tempoh ini, aktiviti penguatkuasaan dan tindakan perundangan boleh diambil, namun, adalah terhad melalui **pendekatan pendidikan penguatkuasaan kepada pengamal PT&K dalam bidang amalan diiktiraf sahaja.**

Pendekatan pendidikan penguatkuasaan berkenaan Akta 775 merupakan satu bentuk aktiviti kesedaran dan pemantauan kepada para pengamal PT&K dalam bidang amalan diiktiraf bagi memastikan supaya para pengamal PT&K mematuhi keperluan yang ditetapkan di bawah Akta 775 serta kewajipan sebagai seorang pengamal PT&K berdaftar dalam menyediakan dan

menyampaikan perkhidmatan PT&K yang berkualiti dan selamat.

Antara pendekatan pendidikan penguatkuasaan adalah seperti pemeriksaan ke atas pengamal PT&K dalam bidang amalan diiktiraf, saringan iklan kemahiran dan perkhidmatan PT&K, dan penerangan dan penjelasan yang berterusan kepada pengamal PT&K dalam bidang amalan diiktiraf berkenaan pendaftaran dan pematuhan kepada Akta 775.

(ii) Selepas Tamat Tempoh Peralihan (Bermula 1 Mac 2025)

Selepas tamat tempoh peralihan, iaitu bermula 1 Mac 2025, aktiviti penguatkuasaan akan diperkasakan dan tindakan perundangan akan bermula kepada para pengamal PT&K dalam bidang amalan diiktiraf yang didapati melanggar dan melakukan kesalahan di bawah Akta 775.

- 6. Saya merupakan pengamal PT&K dalam bidang amalan diiktiraf dan masih belum berdaftar dengan Majlis PT&K. Adakah saya masih boleh mengamal selepas penguatkuasaan Fasa 3, Akta 775?**

Anda masih lagi boleh terus mengamal. Namun, anda wajib berdaftar dengan Majlis PT&K sebelum tamat tempoh peralihan, iaitu **sebelum 1 Mac 2025**. Bermula tarikh tersebut, sekiranya anda masih belum berdaftar dan terus mengamal dalam bidang amalan diiktiraf, anda telah melakukan kesalahan dan boleh dikenakan tindakan perundangan di bawah Akta 775.

Oleh itu, mana-mana pengamal PT&K yang mengamal dalam bidang amalan diiktiraf perlu segera berdaftar dengan Majlis PT&K sebelum tamat tempoh peralihan.

- 7. Sebagai seorang pengamal PT&K dalam bidang amalan diiktiraf, apakah yang perlu saya lakukan ketika dalam tempoh penguatkuasaan Fasa 3, Akta 775?**

Sebagai seorang pengamal PT&K dalam bidang amalan diiktiraf, anda wajib mendaftar dengan Majlis PT&K dan memastikan perakuan pengamalan pengamal berdaftar diperbaharui dalam tempoh tersebut. Sebagai seorang

pengamal PT&K berdaftar, anda bertanggungjawab untuk melaksanakan dan menyampaikan perkhidmatan PT&K yang berkualiti dan selamat, berdasarkan [Kod Tingkah Laku Profesional untuk Pengamal PT&K](#).

Anda juga perlu bersedia untuk menerima kehadiran pegawai penguat kuasa PT&K dan memberikan kerjasama yang sepenuhnya sepanjang aktiviti pemeriksaan yang dijalankan oleh pegawai penguat kuasa PT&K.

8. Adakah premis saya perlu berdaftar/ memiliki lesen daripada Kementerian Kesihatan Malaysia (KKM)?

Pada ketika ini, premis PT&K tidak dikawal selia oleh KKM. Oleh yang demikian, tiada keperluan bagi premis PT&K untuk berdaftar atau memiliki lesen daripada KKM.

Namun, pengamal PT&K adalah disarankan untuk mendapatkan lesen perniagaan daripada Pihak Berkuasa Tempatan (PBT) atau/ dan mendaftar syarikat/ perniagaan dengan Suruhanjaya Syarikat Malaysia (SSM).

Sebagai maklumat tambahan, anda juga boleh merujuk kepada [Guidelines for Traditional and Complementary Medicine Healthcare Facilities and Services in Malaysia](#).

9. Apakah yang akan berlaku sekiranya pengamal PT&K berdaftar tidak memperbaharui Perakuan Pengamalan Pengamal Berdaftar?

Subseksyen 26(1), Akta 775 memperuntukkan bahawa pengamal berdaftar tidak boleh mengamal bidang amalan diiktiraf kecuali jika dia memegang perakuan pengamalan yang sah dan berkuat kuasa. Oleh yang demikian, pengamal PT&K berdaftar yang ingin mengamal bidang amalan diiktiraf hendaklah pada setiap masa mempunyai Perakuan Pengamalan Pengamal Berdaftar yang sah dan masih berkuat kuasa, serta tidak tamat tempoh. Sekiranya pengamal PT&K berdaftar masih terus mengamal dengan Perakuan Pengamalan Pengamal Berdaftar yang telah tamat tempoh dan tidak memperbaharui perakuan tersebut, maka pengamal PT&K berdaftar tersebut telah melakukan suatu kesalahan di bawah Akta 775 dan tindakan tatatertib oleh Majlis PT&K boleh diambil ke atas pengamal tersebut.

10. Saya merupakan pengamal yang menjalankan amalan yang bukan merupakan bidang amalan diiktiraf. Adakah saya masih boleh terus mengamal bidang amalan ini selepas penguatkuasaan Fasa 3, Akta 775?

Ya, anda masih boleh terus mengamal dan dinasihatkan untuk memastikan perkhidmatan yang diberikan adalah selamat dan beretika.

11. Bagaimanakah saya boleh mendapatkan maklumat lanjut berkenaan penguatkuasaan Fasa 3, Akta 775?

Untuk maklumat lanjut, anda boleh melakukan perkara-perkara seperti yang berikut:

- (i) Sila layari laman web Bahagian Perubatan Tradisional dan Komplementari di www.moh.gov.my/tcm;
- (ii) E-mel pertanyaan anda ke tcm@moh.gov.my;
- (iii) Hubungi talian 03 – 2279 8100; atau
- (iv) Salurkan pertanyaan anda melalui Sistem Pengurusan Aduan Awam (SISPAA), KKM di <http://moh.spab.gov.my>.

Bahagian Perubatan Tradisional dan Komplementari

Kementerian Kesihatan Malaysia

1 Ogos 2024